

24/01/2004

Budaya `hangat tahi ayam' dan masyarakat Malaysia

Mahathir Abd Wahab

BERDASARKAN pengamatan saya tiada gunanya kita berpening kepala dan kadangkala membuang masa membincangkan isu-isu semasa dan yang menjejaskan masyarakat jika ia hanya umpama tin kosong.

Ini kerana masyarakat kita dan agensi penguat kuasa khususnya polis hanya mengambil perhatian terhadap sesuatu isu untuk jangkamasa yang tertentu dan amat singkat sekali.

Biasanya perkara berbangkit menjadi topik perbualan hangat untuk tempoh beberapa hari saja sebelum ia tenggelam setelah masyarakat mula melupainya.

Sekarang ini heboh diperbincangkan mengenai perogol dan pembunuh kanak-kanak sejak tragedi Nurul Huda Abd Ghani. Sebelum ini kita heboh memperkatakan isu kemalangan ngeri yang berlaku dan pembunuhan kejam Norita. Isunya ialah sampai bila kita harus mengharungi budaya sedemikian.

Setiap kejadian pasti ada hikmahnya. Lihatlah nasib abang sulung Nurul Huda yang sekarang ini mengalami tekanan mental disebabkan oleh trauma yang dihadapinya.

Cubalah fikirkan apa yang harus dilalui oleh keluarga Norita dan keluarga mangsa kemalangan jalan raya yang terpaksa berdepan dengan pelbagai pihak dan spekulasi yang belum tentunya kebenarannya.

Adalah tidak salah kita membincangkan isu semasa tetapi mesti ada batasannya. Biarlah perbincangan itu bermakna dan mencapai maksud dan disalurkan kepada pihak yang terbabit.

Perbincangan mestilah disusuli dengan cadangan konstruktif tidak berdasarkan kepada emosi semasa. Setiap masalah insya-Allah ada jalan penyelesaiannya.

Dengan cara sebegini tidaklah perbincangan kita menjadi seperti perbincangan di kedai kopi yang hanya sedap didengar tetapi langsung tidak mendatangkan hasil.

Masyarakat Malaysia hari ini lebih berat mengamalkan budaya `hangat-hangat tahi ayam' malah tidak menghayati setiap kejadian yang berlaku untuk digunakan sebagai teladan dan sempadan.

Kita masih alpa bila memandu di jalan raya, kita masih alpa bila meletakkan kenderaan di tempat sunyi. Kita masih lagi membiarkan anak-anak kita berkeliaran tanpa bimbingan yang sewajarnya.

Kita masih lagi membeli barangan cetak rompak, memandu kenderaan tanpa lesen malah jika dapat mahu diberikan lesen dengan jalan mudah iaitu memberi suapan.

Inilah `budaya kuning' yang perlu ditangani secara holistik bukan secara `hangat tahi ayam'.

Kita tidak boleh mengharapkan pihak berkuasa saja, lebih-lebih lagi semakin hari semakin kerap kejadian yang boleh diibaratkan `harapkan pagar, pagar makan padi' atau `harapkan musang menjaga ayam'.

MAHATHIR ABD WAHAB,
Selayang, Selangor.